



上杭縣志

(下)

總纂 丘復
校點 唐鑑榮

上杭縣地方志編纂委員會重印

上杭縣志

(民國二十七年)

下

总纂 丘 复

校点 唐鉴荣

上杭县地方志编纂委员会重印

卷十九 祠祀志

丘复原纂 华其志增纂

祠祀本诸祭法，列举所祀皆有功德在民，其人可法可传，其事可歌可泣，祠而祀之宜也。自淫祀遍天下，而祀典紊矣。兹寺观宫庙列诸《古迹志》。祀典莫大于祀孔，清季升为大祀，仍称释奠。民国三年，改称祀孔。礼制馆有《祀孔大典》一卷印行。十六年以大学院令，废除祀孔，大典就废。今庙学详《学校志》。旧志所载祀礼从略焉。其祭器、乐器皆已无存，亦不备载。至祔祀于学者，明代有乡贤、名宦二祠，清雍正初立忠义孝弟及节孝二祠，于是乃有四祠。旧志皆列庙学，后凡以重其人尊其祀也。顾三代之直道已亡，四祠之崇祀或滥，以地方景贤之典，为金壬贡谏之资，以一二人之滥厕，致人羞与为伍，果何取乎？善乎！大兴刘继庄之言曰：乡贤名宦有祠，公典也，不惟有司不当私其人，虽子孙亦不当私其祖父。昔刘阁老健，河南有司欲以其父入乡贤，告诸刘。刘曰：吾乡贤祠有二程夫子在，吾父何敢并焉。呜呼！刘公之见远矣。祖父无明德而强列俎豆，是辱之非荣之也。继庄之言如此，而为人子孙者，可以思矣。邑之

名宦祠 在学宫戟门左明洪武初，诏天下学校各建先贤祠，左祀贤牧，右祀乡贤，春秋祔祀孔子庙庭。成化中，诏分为名宦、乡贤二祠。万历二年，令抚按官查名宦、乡贤二祠有不应入祀者，即行黜革。祀宋知县孙瑞、郑稷、陈朝章、赵彦挺、赵时钺、李务行，县丞何镐元，摄县事郑从吉，明分巡僉事伍希闵、杜启、邹贤，提学宗臣、熊汲，

分巡金事武尚耕，副使张斗，知县刘亨、秦斌、李自华、吴南灏、陈正中，清知县董凤舞，总督范承谟，巡抚李斯义，提督学政高曰聪、沈涵。《乾隆志》所载计二十五人，《同治续刊》无所增益。据《清史·列传》，王肇谦有上杭请祀名宦之语，今亦无可考证。兹就宋祀七人而言，孙瑞、赵彦挺、李务行先后建筑儒学，郑稷奏迁县治，陈朝章踵而成之，赵时钺平关胡麻之乱而创筑城，其祀也皆宜。惟何镐，淳熙间任上杭丞，治尚宽简，首罢无名征赋。所谓无名征赋者，不知何指。丞本佐职，有何宽简可言，岂与朱文公友善遽加入祠祀乎？至明代知县五人，皆有政绩可纪。惟巡道五人，除伍希闵外，余皆无闻。提学二人亦然。其中岂无不应入祀者乎？何以已列名宦传者，知县如萧宏，巡道如朱大典，反不得祀耶。且巡道如侯廷训、曾樱见诸旧志各门者多有可纪，不犹愈于无闻耶。若夫清自顺治三年有杭逮乾隆修志时逾百一十年，知县得祀者仅一人，亦云慎矣。余皆总督、巡抚、学政则又何耶？非藉以取媚大吏耶？呜呼！是非之公，盖难言矣！

乡贤祠 在学宫戟门。右祀元詹子微，明周子礼、胡时、丘子瞻、李纶、罗经、周弘、范金、丘弘、江瀚、刘敬、李楫、郭资、梁乔、丘道隆、李颖、张恩、陈于阶，凡见十八人。《乾隆志》所有止于明代，岂有忠义孝弟祠，而乡贤祠遂可废乎？至周子礼、江瀚、刘敬，或以义士，或以孝子已祀诸忠义孝弟祠矣，此间可不必重祀者也。

忠义孝弟祠 清雍正元年，诏天下立忠义孝弟及节孝二祠。在学宫明伦堂左畔。祀明周子礼、陈德沂、陈德汉、张爱、李诚、陈详、李纶、丘弘、江瀚、刘敬、张秉和、吴海、梁乔、丘道隆、李颖、李福瑛、丘金、赖思智、赖荣华、周效良、罗孟春、李嘉言、刘佐、刘烜、林才乾、詹恒高、赖思养、林秉守、黄中立、丁致卿，清薛应吉、杨梦吉、郭连城、林鸾、郭萃、黄金元、刘鉴、曹馨、何

榛、郭士焜、范梦蚪、薛桂芳、温济、黄文耨、陈鸾、刘翥凤、张有光、傅维清、薛人骧、林成耀，载至乾隆修志时为止，凡五十人。《同治续刊》并不增列。惟《孝义传》续有丁应三道光间旌表，姜企俨咸丰末旌表，均有传，其必入祠可知。至光绪中有陈英，新志，孝友有传。其后有雷飞腾、郑士豪，余不能详矣。明代三十人中周子礼、宜祀此祠，说具于前。李纶、丘弘、梁乔、丘道隆、李颖已祀乡贤矣，李诚、陈详、刘挺、刘佐亦宜改祀乡贤，而此祠可不必重祀者也。至已祀周效良、赖思养矣，效良同死之张璧秀、思养同死之赖君选及明年与难之赖其勋何以遗之，是皆宜增入者也。

节孝祠 在儒学门外东十步清雍正二年改孟公祠，建今门面为商店。祀明邵缙绅妻陈氏等十四人，清詹鸣华妻赖氏等三十九人。《顾志》俱为立传，其无传者惟最末郭廷品妻严氏一人。别一刊本于葛裔璿聘室刘氏下空格增丘贞裕妻邓氏，祭器下空格增丘先春妻刘氏，二名皆无传，当为《同治续刊》所增。即郭廷品妻严氏，疑亦末后空格，《续刊》增入，故三人皆无传也。《续刊》就《顾志》空格增入不加注明，迹近蒙混，实为不合。康乾三志均无名，如丘先春妻事迹载《菴德堂文集》，今志入补传，《续刊》仅称某人妻某氏而已。至已列传，如周兆元妻张氏，知县蒋廷铨具详请旌，而旧志祠祀无名，不知何故。清道光九年，邑绅蓝桂为合邑汇报节孝，奉准旌表，于是有

新节孝祠 在百获堂文昌殿前门内畔，坐西东向，奉准旌表者列祀其中。其后《同治续刊》列女一门，有专传者二百四十二人，仅列某氏夫某者一千六百七十余人。呜呼！繁已。曾奉旌入祀与否，固未遑详稽也。

民国三年，定祀孔大礼外，复以关羽、岳飞合祀于武庙，配以历代名将，左张飞、王浚、韩擒虎、李靖、苏定方、郭子仪、曹彬、韩世忠、旭烈兀、徐达、冯胜、戚继光；右赵云、谢玄、贺

若弼、尉迟敬德、李光弼、王彦章、狄青、刘锜、郭侃、常遇春、周遇吉，每年以春秋二仲之戌为祀关岳日，邑旧有之。

武庙 本名关帝庙，在县北贞字铺。清雍正五年追封三代，建后殿崇祀。乾隆二十二年，知县顾人骥于大门建石坊，镌曰武庙。近城关庙，一在县北迎恩门内利铺，一在道署前，一在县东昭阳门外潭头，一在县东城楼上，一在县北元铺，一在县西通驷门外。其余庙祀遍于四乡，不能尽载。旧志载祭关帝庙及先代三公祠礼，自关岳合祀已不适用，今从略。邑旧有

岳王庙 在县南城上。清乾隆四年，里人重建。民国三年，虽有合祀之典而合祠缺然，夫合祀关岳以其忠于国也。邑有

大忠庙 祀唐张中丞巡，在县东北兴文坊，旧有东平王庙在东岳宫左廊，嘉靖二年毁。十九年知县伍筵重建于城外北山。万历二十一年，知县邓良佐迁今所，为布政分司。旧址岁久门圯毁，厅亦坏。清康熙五十七年，里人重修。亦景忠之典也。旧时地方官春秋致祭，邑人岁祀，亦冠诸庙，忠义之感人深矣。其统兵驻节或立功，或死事，赫赫在人耳目，因而祀之者则有

褒忠祠 祀明御史伍骥，署都指挥丁泉，在县东北察院行台前。初耆民孔文昌等塑二公像，祀于旧南门城楼。成化八年，同知程熙、知县萧宏择地改建今所。十年，宏奏闻赐今额，岁命官致祭。二十三年，署县推官涂琳新而大之。旧志载刘戡《增修褒忠祠记》曰：天顺壬午，上杭溪南里贼首李宗政愤嫉邑之富豪侵夺，有司弗禁，遂乌合群丑攻破县治，大肆剽掠。监军暨都布按三司以兵驻汀州，闻贼势张甚，不敢进，日椎金鼓，耀士卒，扬虚声，民益骇散，贼愈猖獗，据岩险，诱流亡，时出侵犯傍县，官兵莫能御，退而自保。癸未，监察御史安成伍公骥，奉命按治，于闽次建宁闻之即驰赴汀，檄三司引兵，会议方略，众殊无固志。公因询上杭来者，皆言道梗不可往。公曰：即梗，汝辈安得来。立升肩舆，携数老兵抵上杭，询贼巢穴，闻一致仕教官家居，乃屏徙从单骑造焉。教官惊愕出迎，备言家属被贼驱迫状。公令召若亲戚听告谕。贼见公无他，明日下午

寨来者十数人，公谕以祸福，莫不感泣语闻。贼中降者万余人，立命复旧业。其魁亦欲乞降，会有谋给贼降而诛之者，公固不听而贼怀疑惑，遂拥众不下。公躬督将士逼贼巢以营，贼悉力来拒。都指挥桂福欲避其锋，公拔剑拟福，福跪谢曰：请用命。于是战甚力，贼稍引却。遣都指挥丁泉领奇兵绕出贼后，焚其寨且戒以贼遁勿追。丁乘胜追贼遇伏，鏖战死之。贼死伤亦众。已而，公督战益急，贼遂平，乃班师。公因积苦军中，已染瘴疠，代^①回京师竟以疾卒。上杭民闻之、如哭私亲，抆土肖公像于邑城楼，岁时祭拜，而以丁配享。久之累请当道祀公与丁，未报。岁壬辰，按察司僉事新淦周公谟分巡其地，始从民请，择地于布政分司之前，委其事于汀同知歙县程熙，知县武攸、萧宏，庙得告成。甲午，宏具始末以闻，赐额褒忠，命有司每岁仲春祀以羊豕。丁未，汀推官涂琳来掌邑事，执筮豆于庙，顾瞻感叹，病其隘陋，复新而大之。于是朝廷褒崇之典，齐民怀思之诚，乃大称焉。琳以书来，请记予。按，祭法，能捍大患则祀之，以死勤事则祀之。公与丁之庙食兹土，殆经所谓生于心而奉之以礼，传所谓其始自今，钦于后世者矣。然予于公别有所感也。夫民岂乐于盗贼哉，其未发也，治之不以道；其既发也，绥之不以诚，置之于至危而激之以必变，于是民始以其安居之身而为此族灭之计，故予尝念公之忠不在灭贼，而在于招贼。以身自试于不测，固全躯择利害者之所深避而公不恤也，使公得竟其志则国家无亡矢遗镞之费，反侧之民无肝脑涂地之惨，而上杭之生聚固不但如今日也。然则公之忠之所成者，殆公之遗余乎？是可慨也已。若夫甲冑^②之士奋不顾身而继之以死，古所谓烈丈夫者，如丁之忠，其得配食于公不待论述云。弘治二年，知事周琛扩射圃之余，益以民地重修，仍捐置田以供香火。旧志载马驯《创置褒忠祠祭田记》曰：君子于分内事必求尽心焉，一惟理之是而已，身之安危弗遑恤也。人生大块^③间百年一瞬，偷生忍耻直与草木同腐。审于轻重者，宁肯忽于所困哉！范宣子曰：太上立德，其次立言、立功，此之谓不朽。吾汀之上杭，当天顺壬午间草寇窃发，倒逆天明，虔刘^④边陲，势存猖獗，民苦之。守臣具闻，诏下廷议，将伸天讨。巡按监察御史伍公骥暨守备都指挥丁公泉实董厥师，同心戮力，仗节临戎，不避险难，直捣巢穴。丁则身先士卒，与贼力战死之。伍则督众躬剪其渠魁，奏凯以旋。既殚心虑服兹瘴霾，因而失豫舁疾，如京师遂

不起。杭之民无老弱闻二公之殂，如丧考妣，相与偶语曰：吾侪今日父母妻子之获安，井室田庐之无恙，伊谁之赐欤？乃合谋捐资卜地于邑之东偏，立褒忠祠，塑像祀之，且以庙额未颁，祀典未定，邑令萧侯请于朝得赐匾如前额，仍令有司岁时致祭，所以崇德报功备矣！由是远迩之民咸奔走敬事，奚啻潮人之信昌黎也。又有为后虑者，谓祀户无定役，岁享无主田，则祠宇缺守，日居月诸如在之诚将或有间。兵马孔经等争白知事周琛，哀工抡材，廓而新之，闻风子来，越月而落成。监于旧规赫然伟观，华而不僭，朴而有文。买田百秤有奇，择良户林稳奉之，岁取税入贍其家。备录其堂构之数、田亩之详及倡义者之姓名勒于碑阴，将传诸永久而不磨也。呜呼！源远流长，膏沃者光耀，二公之竭忠于国，布德于民，使人泱肌沦髓而食祀事之报于不朽者，非幸也，宜也。李东阳《改修褒忠祠记》曰：褒忠祠者，祀监察御史伍公骥及都指挥丁侯泉也。初天顺壬午，上杭贼首李宗政攻破县治，放兵四劫，官军莫能御。癸未，公奉命按福建道，闻事急，径驰至汀州，檄三司引兵，会众犹豫未决。公肩輿携数老兵赴上杭，见县狱系贼妇女曰：此何罪。悉纵遣之。闻有一教官致仕家居，屏徙从单骑造其庐询贼情状，令召亲戚听告谕。明日至者十数人，公面谕以祸福，莫不感泣语闻。贼降者前后万余人。公命复旧业。其渠魁亦欲乞降，会有谋绾贼降而诛之者，公固不听而贼怀疑惑，遂拥众不下。公躬督将士逼贼巢以营，贼悉力来拒。都指挥桂福欲避其锋，公拔剑诃之，福跪谢，愿尽死，于是战甚力。贼稍引却，乃遣丁侯领奇兵绕出贼后，纵火焚其巢且戒以贼遁勿追。而丁乘胜追贼遇伏，鏖战以死，贼亦创甚。而公转战益急，贼遂平，乃班师。公因积苦军中已染瘴疠，受代还京师，竟以疾卒。公子希闵归葬于家。上杭耆民孔文昌等闻公讣，相率塑公像于城楼哭而祭之，而侯亦与焉。壬辰，按察僉事周君谟谓像必有祠，檄同知程熙、知县萧宏等建于兹地，名曰褒忠祠。甲午宏等奏其事于朝，赐额如旧。每岁仲春命有司祀以羊豕，著为令。丁未，推官涂琳摄县主祀事，乃于堂后复创屋三间，作三门二庑，又于祠左市民家地衡三丈缩二十丈有奇，因有所增构未成而罢。弘治己酉，知事周琛倡诸耆民各捐私帑扩地，衡缩各二十六丈有奇，构堂三间，易其旧以为寝室，前为重门，增庑室三之二，其后为宰牲之房，守者之居，而垣其四周，复置田亩，择良户林稳奉之，俾岁入其租以供

祀事。乃具书于予曰：愿有记。按《祀典》曰：能御大患，则祀之；以死勤事则祀之。而《周书》曰：记功宗以功作元祀，盖于祀之中又叙其功之小大以为等。若汉萧何发纵指示^⑤而运筹决胜者皆出其下，故凡议所在非君相所得私，孝子慈孙所能易也。伍公在上杭保障捍御，其功甚大，生则事之，死则祀之，礼也。丁侯之功举而附之，亦礼也。或者乃谓侯为守将，亲冒矢石以死，功不在御史下。是不然。公为王朝命使监藩臬以号令行阵^⑥，而侯亲受戒约以行，是不得以守将例论。况侯又违期会以蹈祸机，虽死不悖义而其功亦少杀矣。故邑人之瞻慕有司之论列国家所以表著而彰显之者，皆在公以及于侯，诎不宜哉？公之子今为福建按察金事分巡兹地，每至必拜于祠而后行事，招疑定乱，存著劳绩，民之奉之若事公而益亲。故兹祠之修，趋事惟谨，既成而奉公之祀愈虔。琛承檄剿贼以功迁经历，且于郡事多所干助，盖得公之风而兴者，其为是役，非以金宪君故也。故记之，俾守是土者时葺之^⑦，以示不忘。伍希闵《敬谒褒忠祠》：古庙西临官道傍，香飘合室酒盈觞。朱廉碧砌尘无点，丹荔黄蕉品有常。涧水含悲终古咽，野棠留爱到今芳。不堪肠断经巡处，月落乌啼汀与漳。牲帛中庭祝在傍，泪零血点奠清觞。半生未肯轻三事，一死犹堪重五常。恩浹遗黎长洒泣，名垂汗简久传芳。海天重睹妖氛豁，汀树青青直到漳。罗璟和韵曰：褒忠祠宇外台傍，敬把椒浆奠一觞。臣子殉身惟节义，圣贤扶世只纲常。由来文武同英烈，消得春秋荐苾芳。此日家声重秉宪，棠阴一倍满汀漳。魏瀚和韵曰：驻马何人古道傍，褒忠祠里奠椒觞。民心共戴蒸尝久，士论全昭竹帛芳。愧我半生同出处，羨君一死异寻常。祇今又见高轩过，剩有清威化浊漳。章颙《谒褒忠祠》诗曰：风马云车下帝傍，怒吞蛮血笑持觞。气清山岳今犹昔，化浹人心变亦常。军壁简书鱼鸟畏，宪台冠冕桂兰芳。此情可似汀南水，万古悠悠绕故漳。王淮《题褒忠祠挽丁都司泉》诗曰：大将征蛮势已危，独提一旅是男儿。可怜诸葛星先陨，谁料张巡力不支。史笔不磨传后世，民心知感立新祠。书生多少英雄恨，拭泪临风赋挽诗。万历四十二年毁于火，知县李自华重倡建之，立聚星公馆于其左。《蒋志》云：今岁祀奉废。按，今木主委积，类皆贡谏官吏者。

王文成公祠 祀明都御史王守仁，在城北旧学址，亦名怀德，

久废。详《古迹志》。而四乡别建祠祀之曰：

阳明祠 旧为阳明书院。知县段嶺生有记，详古迹。城乡公地自中街至冈背袤数十丈，广十余丈。清嘉庆中，邑绅蓝桂倡四乡捐建中厅，祀王文成公。两庑宏敞，前廊夹以左右二耳房，院落尤宽，外墙两小角门，咸丰十一年钟宝三扩而大之，中嵌石窗，岁以春冬二仲祭祀，外厅额曰时雨堂，内厅分三龛，祀捐资各名位，东西两书房上下对向，各分内外室，左右墙屋外空开巷道，右为护屋三间两角亭，左供知县段嶺生、沈士焜，邑绅蓝桂三禄位，右供土地祇，中置文成手书石刻《时雨记》碑。其文曰：正德丁丑三月，奉命平漳寇驻军上杭。旱甚，祷于行台，雨日夜，民以为未足。逮四月戊午班师，雨，明日又雨^⑧，又明日大雨，民乃出田。登城南之楼以观，民大悦。有司请名行台之堂为时雨，且曰：民苦于盗久，又重以旱，谓将靡遗^⑨，今始去兵革之役而大雨适降，所谓王师若时雨，今皆有焉，请以志其实。呜呼！民惟稼穡，德惟雨，惟天阴鹭^⑩，惟皇克宪^⑪，惟将士用命效力，去其莠蠹^⑫，惟乃有司实耨获之^⑬，庶克有秋^⑭。予何德之有，而敢叨其功。然而乐民之乐，亦不容于无纪也。是日参政陈策、金事胡琏至，自班师。遂谒文公祠于水南，览七峰之胜概，归志于行台之壁，赋诗志喜焉。落成后，以所余资置买腴田，岁收租储祠中为香灯祭祀花红之费。道光二十年，蓝桂复倡捐就碑记后楼建奎光阁与祠，同日致祭。在城别建

阳明别业 在祠后上冈背巷口，坐北，门之东畔构阑干屋数椽以住典守者。进为雨化亭，内厅摹刊文成《时雨记》手迹于屏风，中为题名厅，前为莲池，外为鱼塘，周砌以花墙，墙西为一鉴轩，再进三厅事，间以水楼月榭，额曰：活泼泼地。游人多宴集于此，称名胜地。此在城捐资与祠同时建。绅董莫洪始终其事，以余资置田，岁收租为春秋祀典及花红闹费之用。咸丰元年，罗萍等扩进后厅，徙题名牌于其中，左更衣所，右住绅董，中抽甬道，旁为走廊，别建仓屋于东西畔及后所二十余间学舍，规模更

加宏敞。其邑人死事建祠者，则有：

武略将军祠 祀邑义勇赖思智。在县东镇东街之南。明正德九年巡按贺泰、李如圭、胡文静，金事胡珪屡疏以闻，敕赠武略将军建祠此地，岁令有司于四月一日忌辰，祀以特牲。按，知县汪应奎有祠记，康乾三志《同治续刊》均不载。二十五年秋，志局同人往查，祠已圯废，片瓦不存。惟门外方形二石柱有穿孔，似系祠祀盛时，是日演剧用以架台者。为清嘉庆十八年癸酉所立，其时祠祀当必尚盛，颓毁何年，《同治续刊》未详。闻光绪中尚存，惟不修葺，渐就圯废。碑嵌墙壁西向，高六尺，阔三尺，圆顶篆书。《武略将军祠记》碑文二十行，行五十字，楷书。兹将原文具载于下：文林郎上杭县知县新安汪应奎撰文，奉政大夫浙江杭州府同知邑人丘道明书丹，中宪大夫四川按察司副使漳浦林功懋篆额。武略将军祠祀武略赖君思智也。君上杭溪南人，赋性忠烈，饶于胆略，遇事敢为，无复顾虑。弘治末，土人犯顺^⑤，因集里中少年捍御有功，县侯闻之，补千夫长。正德间丙寅，广寇侵长泰，虏其长吏，上下震骇。当道召君追袭之，得命即行。丁卯，败寇于金丰，降之。己巳，与广寇战于长居分水，手无寸铁，举釜却贼，身被重伤，裹创进击。师旋，即从贰守唐公淳救赵家寨，屡著奇绩。金宪茹公奎嘉之，锡以冠带。庚午，勒兵于岩前、上中赤，悉定，遂救黎王寨，民获安堵。壬申，群盗扰境，环闽广之界悉为巢穴。时执郡推莫公仲铭、指挥杨侯泽白抚臣请以有能^⑥，就斩新贼者赏以边功。时宪副姚公模、杨公璋，少参郑公毅、金宪邹公贤闻师于杭，檄为前锋。君身先士卒，鼓噪而进，所向无敌，随拔东山寨、挂坑嶂，破悬绳峰，归其官之被执者。寇遁，复以孤军乘胜追于长汀之蜡溪，遇伏绝援，力战死之。时四月一日也。年四十岁。凡前后斩巨馘二百四十余级，折首俘九十余口。柩至，邦人震惊，三司痛悼。大参王公子言亲为文祭之。侍御贺公泰、李公如圭、胡公文静，金宪胡公珪屡疏以闻，天子可之，赠为武略将军，荫其子楷为千户所百户，世袭。仍岁令有司忌辰祀以特牲，以其能捍大患，以死勤事，合祀典也。余因作而言曰：民可与习常，难与处变；可与乐生，难与守死。夫当寇作之时，上焉玩愒养寇，孰恫乃躬？下焉保躯全家，孰乐危阨^⑦？君独为此。其得天地之正气，勇士不忘丧其元者乎？故虽殁于一时，而百世之下，凛然犹有生气。杭川开治三

百余载，而祀典有二，曰褒忠，曰武略。褒忠祀御史伍公骥、都阍丁公泉，议者以二公身为命吏，寄以师旅，靖难捐躯，义也，亦分也。君以畎亩匹夫，不阶一命，竭忠效死，无所为而然似有难于二公者，故国家恤典与之齿焉而世禄之报又或过之。兹盖舆论之公，国法之正也。初议祠于邑之南冈，改居东郊孔道，从民望也。正德乙亥前，令谢侯浩鹄工治祠，肖形立祀，申王章而修有司也。历年既久，风雨颓敝。金宪郑公炯节镇于杭，嘉其绩，捐金重新之，增匾额以永其名焉。夫忠义天性根诸人心，顾其人不多见于天下后世者，得非上之人无以风之，故下之人莫之振以起也。公之此举匪私于赖，惟以劝忠褒死者于前，望生者于后也。适其孙百户荣华不忘祖德，以兄庠生荣光具状为请，予遂据其实而书之。嘉靖二十九年，岁次庚戌，闰六月念日，县丞王瑚、主簿季应策、典史罗镛同立。《赵志》云：乾隆十年，重扩后厅后殿，宏壮美丽，邑人每游观于此。《顾志》云：邑生郭书捐金首倡扩基建。十二年，知县梁钦捐项置买李赖两姓互争庙左店房一间，收租点灯。按，今废址深而狭，后堂三和土外即立有郭祠界碑，若仅如是何以为游观地乎？其左店房亦圯毁。

义勇祠《赵志》作义忠祠。祀义士张璧秀。在县东北布政分司后。明嘉靖二十七年，巡道王时槐建。

忠勇祠 祀百户赖荣华，在县北旧学。明嘉靖三十六年，金事王时槐奏请，敕县建祠。

义烈祠 祀百户赖思养，在冈背街。明崇祯四年，知县陈正中建。

赖百户祠 祀百户赖其勋，在县北北门街。明崇祯六年，知县陈正中建。

全城功德祠 祀全城孝义生员薛应吉，在县治西贞字铺。清康熙十六年，合邑建，坐北，并建孝子坊于门楣。道光二十二年圯于水。咸丰九年，薛氏修复之，并祀其孙孝子薛桂芳。

褒忠祠 祀清东川营殉难参将莫淳。在县西。此皆专祀一人者也。其合祀死事诸人者，则有：

报忠祠祀明崇祯中剿寇死事者，在北门外演武亭右。崇祯五年，

知县陈正中建。

义勇公祠 祀清咸丰七年萝卜岭下死事者，在县东四十里大塘山。咸丰七年，太平军围城。上东路各乡遣勇堵御猴子额。五月八日，敌至岭脚，各丁壮追杀至萝卜岭下，力战移时，敌四面包裹，丘书光等三十九人皆战死。乡人醵金立祠于此，前供诸义勇木主，后厅祀知县程尚确暨捐资名位。

辛亥光复烈士祠 祀民国光复死事诸烈士，在东关外。旧为清惠书院废址。民国元年，省委管带官王挺至县调解城乡冲突事件，既平，择地建祠于此，原名昭愍。二年，兴筑未竣。二十六年冬，重修，拨风亭岭树款百元，城乡公庄款三十元，余由募集。丘荷公书门额曰：辛亥光复烈士祠。正厅龕上立石碑曰：中华民国辛亥光复烈士纪念馆。并为之记，勒石于龕上曰：辛亥武昌首义，举国响应。上杭城乡志士内外合谋，功成反掌，旧令龚时富阳顺阴违，造成十月二十八日之变，烈士遇害者四十二人，伤重死于家者四人。十一月朔，复杀烈士三人。輿情愤激，函电交驰，仰荷孙大总统电闽孙都督道仁，派王管带挺至县调解，措款抚恤，开追悼会，筑烈士坟，更择地建祠于此，以妥英魂。业经兴筑，款绌中辍。越二十六年冬，乃由公款协助百三十元完成之，余由募集，留羨金为祠墓祀费，足见邦人士之好义，抑亦诸烈士在天之灵为不昧也。嗟呼！当日者匪寇伊媾，乃以意见偶违，酿此巨变。死者已惨，生者何安，迄今思之，犹为心恻。祠成爱记颠末，备书姓名，永作纪念。十月二十八日遇害烈士：本县丘师柳、范景明、吴介堂、高启棠、丘成才、丘炳基、刘传昌、刘全柏、刘建秀、刘高廷、刘高田、黄春先、周见龙、卢载元、刘佛保、吴如才、吴联发、吴喜庆、吴添和、吴裕周、吴鸿灿、丘诰喜、丘和林、丘裕芳、丘振友、张广兴、黎彬彦、杨泮英、吴如煌、吴幼山、李升长、李有祥、李明香、李逢雄、李桂芳。永定赖裕增、赖毓华、赖元茂、赖茂山。嘉应童国珍。大埔张瑞卿。合葬西门外演武亭侧。伤重死于家者姓名今无可考。十一月朔遇害烈士丘梦洲，字子溪，本县民立师范毕业生；丘景福、丘凤镛俱本县立本高小毕业生，合葬诸烈士墓前。中华民国二十七年邑人丘荷公撰并书。以上皆以死勤事，推祀关岳之义，祀之宜也。其合祀邑先正^⑨者曰：

八先生祠 祀明布衣陈諫、职方李鲁、诸生邹宗善、永昌通判刘廷标、户部主事刘之谦、东安知县丘隅清、归善知县丘嘉穗、仁和典史林汝霖八先生，在琴冈书院内。清光绪二十七年，拔贡陈嘉谟呈请入祀。此则合忠节道德文章政治而祀之者也。其为各官建者，则有：

王公祠在怀德祠前。明嘉靖三十八年，为兵巡道王时槐建。《顾志》云：入右营箭道。

惠德祠在县东镇东街。嘉靖四十二年，为推官刘宗寅建。

三宪祠在兴文坊。明万历二十五年，为署巡道徐纬，巡道王建中、金节建。

漳南道功德祠在布政分司右。万历三十六年，巡道程朝京檄署县同知区日振营建，祀历任分巡道之有功德者十五人。祠前置店房二十楹，岁入租供修祠及春秋祭祀。朝京为之记曰：闽省当江广之冲而闽之汀漳尤负山滨海，为上下四府两尽处。上杭又界两府中，原割建宁道之汀、福（原作漳误）宁道之漳于成化六年特设漳南巡道，后（原无后字今补）兼兵备以弹压之。盖赣州开镇节制四省，而闽之汀郡（郡疑漳误）属其统辖，若广之程乡、大埔，又与上杭邻跨江右。瑞金诸县丛山深箐，绵亘千里。曩正德末年（正德纪元十六年，王公以十二年至杭，不得云末），群盗盘踞窟穴，时肆燔虐，致勤王师。王公阳明提兵始开虔镇（按，虔镇始于弘治八年，此误），尝驻节于杭，最称重地，以故添设守备司一员练兵。武平所听本道节制。前后诸公莅兹地者，或拨乱于方张，或绥猷于既辑，恩威并用，功德在民。历崇祀典凡十有五人，第因陋就简，以西门巡警铺置诸神牌于中，春秋县所官俎豆祠下，不能班行成礼。盖县有名宦祠，漳南道以宪臣崇祀，非有司所暇议而后来者亦莫一询及也。是百姓相率祀之，当事屑，越慢之，非惟无以教民敬，更以貽神羞矣。余于万历丁未春以备兵至，慨然伤之，因檄上杭县查空闲官地，得布政分司余地二区^①载郡邑志，深一十九丈八尺、阔八丈三尺，洞开重门，堂寝咸飭，共四层围以砖墙，祠墙外之左偏及前门墙外之临街俱有空地，构店屋二十间，入深三丈余，赁人居住翼蔽本祠。岁取房赁以充修祠及春秋祭费。

时汀丞区君日振适署县务，因令预将合用木石砖瓦钉灰及各匠工食，一照民间估值官给现锱^②，听其庀材兴工，不逾时而告竣。斯举也，以既祀之群贤，新一方之庙貌。官输其资，工食其利，一毫无扰于民而用以彰往劝来，关系风化亦非浅鲜矣。按，此记错误甚多，以三志皆载，姑存之，为各正其误于句下。

朱公祠在通驷门内。为巡道朱大典建，有田贍僧供香火。李职方鲁《烬余集》有《赞兵宪朱公生像》诗曰：目击而道存在兹，慈容瞻仰其威仪。深知闽士尊亲久，静觉溪山俎豆宜。云气流来增色相，岚光秀处见须眉。更余梵呗和禅诵，夜夜清机绕阙随。

吴公祠在大忠庙左。明崇祯元年，为知县吴南灏建，有田贍僧供香火。

熊公祠在察院行台右。崇祯三年，为巡抚熊文灿建。

顾公祠在县东大街。崇祯六年，为巡道顾元镜建。邑绅士置田供祀。

陈公祠在熊公祠前。崇祯七年，为知县陈正中建。旧志载龙岩司寇王命璇《邑侯念修陈公祠记》曰：上杭令陈侯，以名进士令杭，清惠宜民，颂声大作。岁辛未，山寇窃发，侯日夜图剿抚之策。寇灭而侯以积劳成疾，死之日简囊萧然，不给扶柩之费。中丞邹公上其事，得温旨优恤。邑弟子员请诸当道，俎豆于学官，声施不朽矣。乃邑之父老谓非崇祀畏垒，无以永致报之思，相率白邑令卢侯。卢侯承陈侯后，爱民洁己，凡事依故躅而愈光其前烈，闻之欣然喜，爰卜地中丞熊公生祠之前。盖熊公以剿寇驻杭，陈侯上条画相与有成，甚相得。两祠相向，其造杭功德正埒也。祠成，杭之绅士乞余为记。噫！余岂待诸绅士之言而始知侯哉。余邑迹杭，闻侯治杭状甚悉。又一再至杭领侯警咳^③，以为蹇蹇匪躬之臣也。侯素羸，然精大于身，一务之施而全力毕注，凡苏民困，励士气，积义谷，核军糈，剖冤清蠹诸善政不可枚举。且持躬冰蘖^④，视醵罚羨赋若污也。当寇发，侯已日喀喀咯血，而筹兵诘饷寝食都废，又亲督三图骁勇冒雨涉险，追贼于层峦邃嶂之中者五昼夜弗休，自是疾日深，犹条画筑岩堡，城石寨，为扼贼永远之图，至死弗已。噫！此余所谓蹇蹇匪躬者哉。今祠成，爽垲焕奕。杭人岁时伏腊走祠下，奉祀弗替，其追慕致报之思于斯少慰，而侯之魂气吾知其彷彿妥止于此中也矣。清顺治五年，邑生郭鸿等捐置店房一楹收租供祀，其祠屡毁屡修。康熙二十

五年，知县蒋廷铨为作《邑侯陈公祠岁祀记》，旧志载其文曰：岁在丙寅，杭诸士郭圉、郭士焜、温圣颜等手一册来，以前邑令陈公念修祠俎豆之事既有成规矣，犹欲余言弁其首以永其业。余受而反复读之，喟然叹兴曰：陈公德化之及人，其深且厚顾若是哉！夫士膺一命，为宰百里，惠苟被于一邑，邑之人必交德之。然方其莅任，莫不景从响附，去则已焉；或去而涖陟显秩，乃相与尸而祝之，歿则又已焉；即既歿之后讴思未衰，及夫代异沧桑，地沦榛莽，有其废之莫或再举，此又时势使然而人情之常也。考陈公之祠，建自故明崇祯甲戌，惟时邑侯卢公实主之，而春秋苾苾其典未备。迨国朝顺治五年戊子，邑生郭鸿辈若干人各捐其资，创置店屋一楹于旧察院行台之右，岁收租入。当仲秋下旬公诞日，相率聚祠下拜酬之，无或旷。未几屋毁，时康熙改元之壬寅也，诸生复如前捐造，而十七年戊午又毁，诸生复捐造如初。夫陈公之歿迄今已六十年，祠屋已屢化为灰烬，乃旋毁旋复历久有如一日，自非当年德化之入人沦于肌肤，决于骨髓，乌能得此哉！忆余暂时，侍先大父宪副公之侧，大父举同谱中才德见重者，每首推陈公。余方幼，初未晓公之梗概，及官斯土始悉公之大有造于地方，瞻拜庙貌辄徘徊不能去，即微多士之创置，敢令其祀事有或阙乎？成规具在，守而弗替，不特多士共永报德之思，而余仰止之怀亦有所藉，是固大可幸也。夫是以乐受诸士之请，而略识数言于左。

冯公祠在天王寺左。崇祯十二年，为巡道冯之困建。邑生郭化鯤等捐置西郊坝地暨祠侧店一间，收租供祀。

李道祠在天王寺左。为巡道李景渠建。《顾志》云：官春秋致祭。按，此祠蒋赵二志皆未载，《顾志》于建置之年亦空格。

清忠祠本卢公祠，在通驷门外。崇祯四年，为知县卢跃龙建。先是附近有知县倪应眷、李自华，署县同知熊茂松，署县推官寇从化四祠，皆万历天启间建。后皆毁于寇，故改今名，合五公并祀云。

周方伯祠在县西大街凤翥坊下畔北向。清顺治八年，为署巡道布政使周亮工建。《续刊·建置》云：后为市儉占灭。道光十八年，邑绅莫树椿、姜鹄、郭冠群、林慕惇、郭鸣皋、郭琳、丘麟书鸣官判还，经七人捐资重建，仍祀方伯并勒石祠畔。

王公祠在镇东街。顺治十四年，为总镇王之纲建。

刘公祠在周方伯祠左。顺治十七年，为巡道刘三章建。

孟公祠在儒学左。清康熙元年，为知府孟熊臣建。雍正二年改建节孝祠。

申公祠在城隍庙左。康熙二年，为巡道申伟抱建。

封公祠在登瀛门上畔。康熙二年，为知县封珂建。雍正二年改建育婴堂。

董公祠在县东门外潭头。康熙三年，为总兵董大用建。

汪公祠在县东仁圣宫左巷。康熙二十九年，为知县汪曾垣建。

翁公祠在大忠庙左。康熙四十五年，为知县翁大中建。

周公祠在儒学右。康熙五十三年，为知县周宗濂建。

冯公祠在县西十步。康熙五十四年，为知府冯协一建。五十七年，知县段岷生改为龟山书院，以冯公祔，后改社仓。清光绪二十五年，改筑义仓。今赁商店。以上各祠或改作他用，或占为民房，或破漏不堪，或湮灭无迹。盖崇德报功之典，原视其人功德之大小而分。功德大者则崇报长，否则当前赫奕转瞬而精气销磨，风流云散矣。兹就旧志存之，使后有考镜云尔。邑有特别祠祀谓之公庄，如前所志四乡阳明祠，在城阳明别业是也。大率因公修建，倡义捐资，事成以其余资建祠题名，并置产以资祭祀及培材之用。于前所志外，有为城乡合建者曰：

百获堂 在县北门街西畔。清嘉庆八年，奉敕建文昌殿。城乡捐资，本琴冈书院后高阜余址扩而平之。门东向，正殿南向，前为月台，缭以石栏，三面环庑，东西两厅事各通内厅，奉帝君先代牌位。前有月廂^②左右陪房二，由前殿两庑通月门，即为此堂。前为宴会厅。后厅分三龛题各捐资名位，西畔护屋上下四间以住绅董典守者。岁以春冬二仲城乡合祭，以所余资城乡分别立庄置产，收租供祭祀，旧时并为岁科试新进及食饩贴册费暨乡会试中